

Treoirlínte d'iarratasóirí

SCÉIM NA FOILSITHEOIREACHTA (2027-2029)

Treoirlínte:

Cuireann na treoirlínte seo eolas ar fáil faoi Scéim na Foilsitheoireachta (2027-2029).

Cuideoidh siad leat:

- cinneadh a dhéanamh an bhfuil d'eagraíocht cáilithe le cur isteach ar mhaoiniú faoin scéim seo,
- iarratas a ullmhú ina bhfuil an t-eolas go léir atá de dhíth.

Léigh go cúramach iad, le do thoil, sula dtabharfaidh tú faoin iarratas a chomhlánú.

1. Mar gheall ar an scéim seo

Tá maoiniú á chur ar fáil ag Foras na Gaeilge d'fhoilsitheoirí in Éirinn atá ag foilsiú i nGaeilge go príomha.

Aidhmeanna

- Scríbhneoireacht, foilsitheoireacht agus léitheoireacht i nGaeilge a chothú i measc réimse leathan de spriocphobail léitheoireachta
- Saothair litríochta i nGaeilge atá ar ardchaighdeán maidir le hábhar agus le cur i láthair a chur os comhair an phobail
- Eolas faoi fhoilsitheoireacht na Gaeilge a chur os comhair an phobail

Cur chuige céimnitheach atá beartaithe sa scéim seo, le fócas dírithe, ag brath ar staid forbartha an iarratasóra.

Aithnítear dhá chéim forbartha faoin scéim seo, **Céim 1** agus **Céim 2**.

1. Faoi **Chéim 1**, tugtar aitheantas d'fhoilsitheoirí a **bhfuil dul chun cinn suntasach déanta mar aon le deiseanna forbartha aitheanta** acu i réimse na foilsitheoireachta Gaeilge.
2. Faoi **Chéim 2**, dírithe ar fhoilsitheoirí a bhfuil **dul chun cinn áirithe déanta mar aon le deiseanna forbartha aitheanta** acu i réimse na foilsitheoireachta Gaeilge.

Tréimhse mhaoinithe **trí bliana (an 1 Eanáir 2027 go dtí an 31 Nollaig 2029)** atá ar fáil d'iarratasóirí, agus beidh uasmhéid an mhaoinithe ag brath ar incháilitheacht faoi réir na staid forbartha agus chomhlíonadh na gcritéar thíosluaite.

Beidh an scéim iomaíoch seo oscailte d'iarratasóirí, idir dheontaithe reatha agus iarratasóirí nua, ó áit ar bith in Éirinn, agus caithfear le gach uile iarratas ar an dóigh chéanna tríd an bpróiseas measúnaithe.

De bhrí gur scéim iomaíoch í, ní féidir barántas a thabhairt go gcuirfear maoiniú ar fáil faoin scéim do cheann ar bith de na deontaithe reatha. Tá súil againn go mbeidh éileamh mór ar an scéim seo agus beidh maoiniú le tairiscint do líon teoranta iarratasóirí.

Is le hairgead poiblí a bhronntar deontais, agus tá dualgais reachtúla ar Fhoras na Gaeilge luach ar airgead gach tionscadail mhaoinithe a dheimhniú.

Molann Foras na Gaeilge d'iarratasóirí cómhaoiniú a lorg le haghaidh tionscadal, nuair is cuí, agus comhoibriú le heagraíochtaí eile leis an luach is fearr a fháil ó dheontas Fhoras na Gaeilge.

2. An féidir linne cur isteach air?

Le bheith incháilithe le cur isteach ar an scéim seo caithfidh d'eagraíocht a bheith in ann na critéir cháilitheacha seo a leanas a chomhlíonadh;

- Eagraíocht faoi stiúir coiste nó boird le sainróil dheimhnithe, le bunreacht, ráiteas bainc cothrom le dáta in ainm an iarratasóra agus cuntais deimhnithe ag cuntasóir cairte, sonraí cánach agus seicliosta um chumhdach leanaí, má bhaineann, **nó** comhlacht, gnólacht, trádálaí aonair cláraithe le meabhráin agus airteagail agus ráiteas bainc cothrom le dáta
- Cuntas bainc a bheith acu in ainm na heagraíochta, atá faoi stiúir choiste nó bhord na heagraíochta
- Cóip shínithe agus dhátaithe de bhunreacht nó meabhrán agus airteagail chomhlachais, mar is cuí

A. Céim 1

Le bheith incháilithe, ní mór d'eagraíocht na critéir cháilitheacha seo a leanas a chomhlíonadh:

- **15 leabhar** foilsithe thar an tréimhse 2024-2025 faoi Scéim na Foilsitheoireachta 2024-2026
- Plean bliana le haghaidh 2027 ina sonraítear táirgeacht, costais foirne agus oifige, margaíocht agus eile a bheith curtha ar fáil
- Cóip den phlean straitéiseach don tréimhse 2027-2029 a bheith curtha ar fáil
- Stíl tí eagarthóireachta a bheith curtha ar fáil
- Gan a ndóthain acmhainne a bheith ag an eagraíocht leis an tionscadal a reáchtáil iad féin, is é sin go bhfuil gá le maoiniú
- Cumas na heagraíochta foinsí ioncaim nó maoinithe eile a aimsiú agus a bhainistiú a thacódh le cur i bhfeidhm phlean straitéiseach na heagraíochta

B. Céim 2

Le bheith incháilithe, ní mór d'eagraíocht na critéir cháilitheacha seo a leanas a chomhlíonadh:

- Plean bliana le haghaidh 2027 ina sonraítear táirgeacht, costais foirne agus oifige, margaíocht agus eile a bheith curtha ar fáil
- Cóip den phlean straitéiseach don tréimhse 2027-2029 a bheith curtha ar fáil
- Stíl tí eagarthóireachta a bheith curtha ar fáil
- Gan a ndóthain acmhainne a bheith ag an eagraíocht leis an tionscadal a reáchtáil iad féin, is é sin go bhfuil gá le maoiniú

- Cumas na heagraíochta foinsí ioncaim nó maoinithe eile a aimsiú agus a bhainistiú a thacóidh le cur i bhfeidhm phlean straitéiseach na heagraíochta

Féadfaidh Foras na Gaeilge cur leis na critéir cháilitheacha seo.

Má tá aon cheist agat faoi ghné ar bith de na critéir cháilitheacha, is féidir leat teagmháil a dhéanamh le Foras na Gaeilge [roimh an spriocdháta](#).

3. Cé mhéad maoiniú is féidir linn a fháil?

Is féidir maoiniú trí bliana a fháil ag tosú in Eanáir 2027. Má éiríonn le hiarratas, agus ag brath ar chiste na scéime, déanfaimid an maoiniú seo a leanas a thairiscint **ar bhonn bliantúil don thréimhse 1 Eanáir 2027 - 31 Nollaig 2029**:

- **Céim 1:** €200,000 ar a mhéad sa bhliain
- **Céim 2:** €100,000 ar a mhéad sa bhliain

Beidh maoiniú bhliain a dó ag brath ar fheidhmíocht shásúil i mbliain a haon agus beidh sin amhlaidh gach bliain eile le linn thréimhse na scéime.

Tabhair do d'aire go mbeidh an leibhéal deontais a bhronnfar ar iarratasóirí éagsúla faoi gach céim ag brath ar chaighdeán an iarratais. Má bhíonn tearcáileamh faoi chéim ar bith, déanfar gach iarracht an maoiniú a aistriú chuig an chéim eile ag brath ar an éileamh agus ar an riachtanas. **Má thagann athrú ar bhuiséad bliantúil Chlár na Leabhar Gaeilge le linn thréimhse na scéime, is féidir go leasófar na huasmhéideanna faoi gach céim agus/nó an leibhéal deontais a bhronnfar dá réir.**

Costais incháilithe

Beidh na costais sa tábla thíos incháilithe faoin scéim do gach deontas bliantúil a cheadófar. Tabhair faoi deara **nach bhfuil** na huasmhéideanna seo inaistrithe ó chostas amháin go dtí costas nó costais eile.

Táirgeacht	Ranníocaíochtaí i dtreo costais foirne nó oifige	Margaíocht	Caiteachas Eile
Uasmhéid 100% den deontas bliantúil	Uasmhéid 40% den deontas bliantúil	Uasmhéid 30% den deontas bliantúil	Uasmhéid 30% den deontas bliantúil

Le linn thréimhse na scéime, beidh sé de chead ag foilsitheoirí costais táirgeachta a éileamh roimh don leabhar a bheidh foilsithe, ach sonraisc bhaíl a bheith curtha ar fáil mar chuid den éileamh ar íocaíocht. Is gá éileamh a dhéanamh ar shonrasc sa bhliain inar eisíodh é. E.g. Sonrasc dár dháta 02/02/2027 a éileamh sa bhliain 2027.

Costais neamh-incháilithe

Beidh na costais thíos neamh-incháilithe faoin scéim do gach deontas bliantúil a cheadófar:

- caiteachas caipitil
- urraíocht

- costais a tharlaíonn sula dtairgimid deontas duit
- costais a bhfuil ceadúnas pleanála de dhíth ina leith
- costais atá míréasúnta i dtuairim Fhoras na Gaeilge
- míreanna atá de fhreagracht maoinitheoirí eile, dúbláil ar aon tionscadal atá ann cheana féin

4. Cad é mar a mheasfar na hiarratais?

Úsáideann Foras na Gaeilge critéir mheasúnaithe le hiarratais a mheasúnú. Tá critéir mheasúnaithe na scéime leagtha amach thíos. Measfaimid agus scórálfaimid iarratais de réir na gcritéar seo. Is gá **65% ar a laghad** a fháil le go mbronnfar deontas ar an iarratasóir.

Céim 1	
Riachtanais	Marc
An gá atá leis an maoiniú	10
Caighdeán na bpleananna	
Plean straitéiseach na heagraíochta	30
Plean bliana le haghaidh 2027	15
Eolas faoi fhoilsitheoireacht na Gaeilge a chur os comhair an phobail	10
Stíl tí eagarthóireachta	5
Cumas na heagraíochta	
Cumas bainistíochta na heagraíochta	15
Cumas pleanála na heagraíochta	5
Cumas bainistíochta airgeadais na heagraíochta	10
Iomlán	100

Céim 2	
Riachtanais	Marc
An gá atá leis an maoiniú	10
Caighdeán na bpleananna	
Plean straitéiseach na heagraíochta	30
Plean bliana le haghaidh 2027	15
Eolas faoi fhoilsitheoireacht na Gaeilge a chur os comhair an phobail	10
Stíl tí eagarthóireachta	5
Cumas na heagraíochta	
Cumas bainistíochta na heagraíochta	15
Cumas pleanála na heagraíochta	5
Cumas bainistíochta airgeadais na heagraíochta	10
Iomlán	100

Coinníollacha ar leith

- **Formáid na leabhar:** Cuireann Foras na Gaeilge fáilte ar leith roimh iarratais ar fhoilseacháin i bhformáidí éagsúla a fhreagraíonn do riachtanais éagsúla an phobail léitheoireachta Gaeilge e.g. leabhair chlóite, ríomhleabhair, closleabhair.
- **Athchlónna:** Ní ghlacann Foras na Gaeilge le bplean foilsitheoireachta atá bunaithe ar athchlónna amháin. Tá sé de cheart ag foilsitheoirí athchlónna a chur ar an bhfoirm iarratais agus beidh na leabhair sin **le meas ceann ar cheann**.
- **Inphrionta(i) an fhoilsitheora:** Tá sé de chead ag foilsitheoirí leabhair nó leabhar a bhaineann le hinphrionta(i) an fhoilsitheora a chur ar an bplean foilsitheoireachta. Déanfaimid na leabhair seo a mheas ceann ar cheann.
- **Leabhair ilteangacha:** Tá sé de chead ag foilsitheoirí leabhair ilteangacha a chur ar an bplean ach an bunsaothar a bheith i nGaeilge. Déanfaimid na leabhair seo a mheas ceann ar cheann. I gcás aistriúchán agus leabhair ilteangacha, ba cheart a shonrú cén teanga(cha) eile atá i gceist.
- **Aistriúcháin:** Tá sé de cheart ag aon fhoilsitheoir **suas le 20% de líon na leabhar ar an bplean bliana a bheith ina aistriúchán ó aon teanga, Béarla san áireamh**. Má tá níos mó ná 20% le foilsiú in aon bhliain amháin ag foilsitheoir ar bith, caithfear sin a chur in iúl d'Fhoras na Gaeilge agus déanfar sin **a mheas ceann ar cheann**.
- **Foilseachán dátheangach:** Sa chás gur mian le foilsitheoir leabhar dátheangach a chur ar an bplean bliana, caithfear sin a chur in iúl d'Fhoras na Gaeilge agus déanfar sin **a mheas ceann ar cheann**.
- **Aistriúchán, nó leagan Béarla:** Má fhaigheann teideal maoiniú faoi Scéim na Foilsitheoireachta, is gá fanacht dhá bhliain ar a laghad sula bhfoilseofaí aistriúchán, nó leagan Béarla den saothar sin ach amháin sa chás gur i dtír eile seachas oileán na hÉireann a bheadh an t-aistriúchán á fhoilsiú agus á dháileadh.
- Níl **téacsleabhair scoile** incháilithe do mhaoiniú tríd an scéim seo.

Coinníollacha maidir le foilsiú na leabhar

- Ní mór do thithe foilsitheoireachta cúram a dhéanamh de chaighdeán an ábhair atá siad a fhoilsiú, ó thaobh eagarthóireachta agus dearadh de, mar shampla, agus a chinntiú go bhfuil na leabhair a fhoilsítear ar ardchaighdeán.
- Ní mór do thithe foilsitheoireachta a fhaigheann maoiniú faoin scéim seo aitheantas a thabhairt do thacaíocht Foras na Gaeilge ar a gcuid foilseachán. Moltar an fhoclaíocht seo a leanas, nó a leithéid chéanna, a chur san áireamh ar leathanach brollaigh an fhoilseacháin: “Tá <ainm an fhoilsitheora> buíoch d’Fhoras na Gaeilge as tacaíocht airgeadais a chur ar fáil”.
- Ní mór do thithe foilsitheoireachta [lógó Foras na Gaeilge](#) a léiriú ar leathanach brollaigh an fhoilseacháin chomh maith.
- Ní mór do thithe foilsitheoireachta **dhá chóip chrua** de gach leabhar nua a fhoilseofar faoin scéim a chur ar fáil do Chlár na Leabhar Gaeilge, Foras na Gaeilge.
- Ní mór do thithe foilsitheora leagan PDF d’athchlónna a chur ar fáil do Chlár na Leabhar Gaeilge, Foras na Gaeilge.
- Ní mór do thithe foilsitheoireachta a fhaigheann maoiniú faoin scéim seo, agus a bhfuil a leabhair á ndáileadh trí Áis, bileog réamheolais i leith gach leabhair a chur ar fáil d’Áis **ar a laghad sé seachtaine roimh dháta foilsithe an leabhair sin**.

5. Cad é mar a chuirfimid isteach air?

Sula dtabharfaidh tú faoin bhfoirm iarratais a chomhlánú léigh na treoirlínte ina n-iomláine arís agus déan cinnte go gcomhlíonann d’eagraíocht critéir cháilitheacha na scéime faoi mhír 2 thuas.

Is trí ríomhphost amháin a ghlacfar le hiarratais don scéim seo. Ní ghlacfar le cóipeanna crua d’iarratais. Caithfidh tú gach ceist ar an fhoirm iarratais a fhreagairt.

Is é **12 meán lae Dé Luain an 5 Deireadh Fómhair 2026** an spriocdháta le haghaidh iarratas.

Faoin eagraíocht féin atá sé a dhéanamh cinnte go bhfuil an t-iarratas comhlánaithe agus curtha isteach in am. **Ní ghlacfar le haon iarratas i ndiaidh an spriocdháta.**

Má tá aon cheist agat faoi ghné ar bith den iarratais, déan teagmháil le Foras na Gaeilge roimh an spriocdháta.

6. Cad é a tharlóidh dár n-iarratas?

Déanfar gach iarratas bailí a mheas faoi na critéir a luaitear i mír 4 thuas.

Cuirfear an cinneadh maoinithe in iúl d’eagraíochtaí trí ríomhphost. Gheobhaidh tú admháil ag an seoladh ríomhphoist a chuir tú ar fáil.

Cealófar aon iarratas a ndéantar stocaireacht faoi le haon chomhalta boird nó le haon fhostaí de chuid Foras na Gaeilge.

Cealófar aon iarratas ina dtugtar eolas míchuinn.

Is é feidhmeannas Foras na Gaeilge atá freagrach as gach cinneadh faoi gach tionscadal atá le maoiniú, agus a chuirfidh gach cinneadh maoinithe i gcrích.

7. Má éiríonn lenár n-iarratas?

Má éiríonn le d’iarratas cuirfimid tairiscint chugat trí ríomhphost ina mbeidh gach eolas ábhartha maidir le híocaíocht agus monatóireacht dheontas na scéime.

Conradh dlíthiúil a bheidh sa tairiscint seo agus ní mór cloí le téarmaí agus coinníollacha an chonartha sin. Is féidir go ndéanfar aon sciar den deontas nó an deontas ar fad a chealú nó a aisghairm má sháraítear aon cheann de théarmaí nó choinníollacha an chonartha.

Ní mór cuntas bainc a bheith ann in ainm na heagraíochta, agus é a bheith faoi stiúir coiste nó boird. Is cóir gach íocaíocht ó dheontas Foras na Gaeilge a íoc as an gcuntas seo le go mbeidh cuntas scríofa ar fáil ar gach íocaíocht (mar shampla seic, dochar díreach, cárta bainc a bhaineann leis an gcuntas, BACS etc.).

Níl sé ceadmhach cárta pearsanta bainc nó creidmheasa nó eile a úsáid agus ní cheadófar aisíocaíochtaí ón gcuntas chuig cárta pearsanta in aon chás.

Ní chuirfidh Foras na Gaeilge maoiniú ar fáil d’íocaíochtaí a dhéantar le hairgead tirim.

Ní dhéanfaidh Foras na Gaeilge aon mhaoiniú ar chaiteachas nach bhfuil ceadaithe roimh ré. Ní íofar aon deontas go siarghabhálach.

8. Cad é mar is féidir liom aiseolas a thabhairt, gearán a dhéanamh nó achomharc a lorg?

Cuireann Foras na Gaeilge fáilte roimh aon mholtaí nó aiseolas a bheadh agat faoin scéim seo.

Má tá ábhar gearáin agat faoin scéim seo is féidir sin a chur in iúl d'Fhoras na Gaeilge chomh maith.

Tá córas achomhairc i bhfeidhm ag Foras na Gaeilge. Mura bhfuil tú sásta leis an gcinneadh a rinneadh maidir le d'iarratas, is féidir leat athbhreithniú a lorg i scríbhinn taobh istigh de cheithre lá dhéag ó dháta na tairisceana faoin gcinneadh. Ní mór gach iarraidh ar athbhreithniú a bhunú ar na cúiseanna seo amháin:

- i. Go ndearna Foras na Gaeilge míléamh ar an eolas a tugadh i rith an mheasúnaithe.
- ii. Gur imigh Foras na Gaeilge, ar dhóigh shubstaintiúil, ón bpróiseas measúnaithe féin.